

■ COLUMNA

Il frar grond

La «stafla» rumantscha – tge è capità fin ussa

DA DAVID TRUTTMANN

Avant tschintg emnas eran entradas 10 personalitads rumantschas en il container blau a Stierva: Duas dal Surmeir, duas da la Surselva, duas da l'Engiadina, duas da la Sutselva e duas da Cuira. Tut las tschintg candidatas ed ils tschintg candidats eran be aspectativas e mintgin/adad ellas ed els aveva grondas speranza da pudair incassar a la fin ils 300 000 francs sponsorisads da la Lia rumantscha. La «Televisiun transrumantscha» (TTR) emetta dapi lura – grazia a las cameras zuppadas – durant la primetime, a las 19.30, las pli novas novitads or dal container.

Basta, en il container blau hai dà già l'emprima saira grondas tensiuns. La Sutsilvana Gina na chapiva gnanca pled da quai che la Valladra Flurina scheva. Sin quai ha Gieri (da Ruschein) manegià che Gina saja ina margnacca intellectuala, e ch'ella saja en quest container totalmain al fauss lieu. Flurina aveva dentant cumpassiun cun Gina, l'ha confortada ed ha ditg a Gieri ch'el saja in grobian. A quel era quai



però tuttina. El ha prendì ina biera or da la frestgera ed ha fatg viva cun Toni, ses colleg surmiran. Però la dumengia suenter han las aspectaturas ed ils aspecturs rumantschs spedi Gieri or dal container.

La segunda emna è stada la gronda discussiun da las frisuras. Men aveva manegià – en idiom puter – che Marietta (Surmirana) para cun sia frisura be in

babau, e che la punk-fritta da Samuel, il «Churer», sumeglia plitost ad in barschun da dents. La Surmirana ed il «Churer» eran permalads enormamain. Perquai han els er nominà Men per la selezziun. E quella dumengia è Men sgulà or dal container.

La terza emna hai dà l'emprim Lpèrin rumantsch: Flurina e Marc. La telefonista da Sent ed il manager da marketing dad Andeer s'avevan chattads – en la tualetta. Da la scena d'amur ha la TTR be emess ina sequenza da trais secundas. Sin la dumonda tge ch'els veglian dir uss a lur amitga ed amitg dador il container, ha respundì Flurina: «Merda», e Marc ha ditg: «Oha». La dumengia suenter è Flurina sgulada or dal container, e Marc fa dapi lura l'amur cun Marietta.

La quarta emna ha Gieri (quel che era sgulà or dal container già l'emprima emna) publicità ses disc cumpact cun il titel «Nus Rumantschs tutgain ensemen». E precis durant quella quart'emna hai dà en il container blau la gronda dispita interrumscha.

Ciglia (da Cuira) ha pretendì ina saira che ils pli cools Rumantschs sajan quels che vivan a Cuira. Prisca da Lumbrein ha ditg immediatamain a Ciglia ch'ella saja ina vipra. Toni ha manegià che tut ils Rumantschs che sajan emigrads a Cuira hajan in complex, ed ha bitschà vinavant Prisca. Quella fin d'emna han las aspectaturas ed ils aspecturs rumantschs spedi Ciglia or dal container.

Uss essan nus en la tschintg-avla emna dal «frar grond». Gina, Marc, Prisca, Toni, Marietta e Samuel èn anc adina en il container blau si Stierva. Ier ha communitgà la TTR che la quota d'aspectaturas ed aspecturs na saja anc mai stada uschè auta tar ina emissiun rumantscha, gnanc tar l'emissiun da novitads «Retrosguard». La direcziun planischa perquai gia la segunda «stafla» dal «frar grond». L'idea è dad integrar la proxima giada er anc ina persuna da lingua tudestga ed ina che fa finta da discurre rumantsch grischun. La TTR less però surtut vesair en il container blau anc daplì sex, e quai sur ils cunfins linguistics or.